



Број/Број: 03-/4-50-1-10-20-12/9
Сарајево/Сарајево: 4. 2. 2009. године

ZAPISNIK

20. sjednice Zajedničke komisije za evropske integracije Parlamentarne skupštine BiH, održane 3. 2. 2009.

Sjednica je počela u 11 sati.

Predsjedavajući Halid Genjac sazvaо je 20. sjednicu Zajedničke komisije za evropske integracije Parlamentarne skupštine BiH (u daljnjem tekstu: Komisija).

Sjednici su prisustvovali članovi Komisije: Halid Genjac, Drago Ljubičić, Ivo Miro Jović, Šemsudin Mehmedović, Rudo Vidović, Zoran Koprivica, Hilmo Neimarlija, Alma Čolo, Selim Bešliagić, te Vlatka Dangubić, sekretar Komisije, i Vladana Lučić, stručni saradnik u Komisiji. Branko Dokić, Milica Marković i Azra Hadžiahmetović opravdali su odsustvo.

Predstavnici Misije OSCE-a u BiH kao i predstavnici OHR-a također su prisustvovali sjednici.

Sjednicom je predsjedavaо predsjedavajući Komisije Halid Genjac.

DNEVNI RED

1. Usvajanje Zapisnika 19. sjednice Komisije;
2. Davanje mišljenja o dokumentima „Izveštaj o napretku u BiH u 2008. godini“ i „Strategija proširenja i ključni izazovi 2008./2009.“;
3. Razmatranje odredbi Poslovnika Doma naroda o nadležnostima Zajedničke komisije za evropske integracije s ciljem davanja preporuka za izmjene poslovnika Doma naroda i Predstavničkog doma;
4. Razmatranje preporuka UNHCR-a Češkoj Republici povodom njenog predsjedavanja EU;
5. Tekuća pitanja.

Ad. 1. Usvajanje Zapisnika 19. sjednice Komisije

Zapisnik 19. sjednice Komisije usvojen je jednoglasno.

Ad. 2. Davanje mišljenja o dokumentima „Izveštaj o napretku u BiH u 2008. godini“ i „Strategija proširenja i ključni izazovi 2008./2009.“

Komisija je, povodom zahtjeva Kolegija Predstavničkog doma u vezi sa inicijativom o razmatranju „Izveštaja o napretku Bosne i Hercegovine u 2008. godini“, nakon provedene rasprave u kojoj su učestvovali: Halid Genjac, Ivo Miro Jović, Zoran Koprivica, Selim Bešlić, Hilmo Neimarlija i Rudo Vidović, jednoglasno usvojila sljedeći **zaključak**:

„Poziva se Zajednički kolegij oba doma PSBiH da, u roku od 30 dana, zakaže zajedničku tematsku sjednicu oba doma Parlamentarne skupštine BiH na kojoj će predsjedavajući Vijeća ministara BiH podnijeti izvještaj o ispunjavanju obaveza iz Sporazuma o stabilizaciji i pridruživanju i provođenju prioriteta iz Evropskog partnerstva sa BiH“.

Obrazloženje:

Neophodna je i hitno potrebna parlamentarna rasprava o procesu integriranja Bosne i Hercegovine u EU.

„Izveštaj o napretku Bosne i Hercegovine u 2008. godini“ može poslužiti kao povod ali je za produktivnu parlamentarnu raspravu neophodan izvještaj predsjedavajućeg Vijeća ministara BiH o toku ispunjavanja svake konkretne obaveze iz Sporazuma i svakog konkretnog prioriteta iz Evropskog partnerstva.

Uostalom, prema zaključcima oba doma Parlamentarne skupštine BiH, usvojenim u septembru 2008. godine, obaveza je predsjedavajućeg Vijeća ministara BiH da takav izvještaj podnosi Parlamentarnoj skupštini BiH svaka tri mjeseca.

U okviru ove tačke dnevnog reda, Komisija je razmatrala i aktuelne probleme u vezi s liberalizacijom viznog režima, a posebno one koji se odnose na propuste u personalizaciji putnih isprava.

Nakon rasprave, dogovoreno je da Komisija sugerira kolegijima Doma naroda i Predstavničkog doma da u dnevni red prve naredne sjednice uvrste sljedeću tačku:

"Problem provođenja obaveza definiranih Mapom puta za liberalizaciju viznog režima povodom nepovjerenja koje su iskazali predstavnici Evropske unije u sistem personalizacije putnih isprava."

Ad. 3. Razmatranje odredbi poslovnika Doma naroda o nadležnostima Komisije za evropske integracije s ciljem davanja preporuka za izmjene poslovnika Doma naroda i Predstavničkog doma

Predsjedavajući je upoznao članove Komisije sa zahtjevom za dostavljanje mišljenja koji je uputila Ad hoc komisija za pripremu izmjena i dopuna, te prečišćenog teksta Poslovnika Doma naroda PSBiH, a koji se odnosi na Odjeljak E (Zajedničke komisije oba doma PSBiH) Poslovnika Doma naroda.

On je informirao članove da je Ad hoc komisija zatražila od svih zajedničkih komisija oba doma PSBiH da razmotre odredbe poslovnika domova i Ad hoc komisiji za pripremu izmjena i dopuna, te prečišćenog teksta Poslovnika Doma PSBiH dostave mišljenje o utvrđenim nadležnostima svoje zajedničke komisije i eventualne prijedloge za izmjene ili dopune nadležnosti.

Dogovoreno je da članovi Komisije do naredne sjednice razmotre Prijedlog nadležnosti Komisije, te da Komisija dostavi jednoglasne prijedloge Ad hoc komisiji.

Ad. 4. Razmatranje preporuka UNHCR-a Češkoj Republici povodom njenog predsjedavanja EU

Zajednička komisija za evropske integracije je, na osnovu odluke Kolegija Predstavničkog doma, razmatrala dokument „Evropa bez barijera: Preporuke UNHCR-a Češkoj Republici povodom njenog predsjedavanja Evropskom unijom“.

Nakon rasprave, članovi Komisije jednoglasno su usvojili sljedeće **zaključke**:

1. Zajednička komisija za evropske integracije podržava preporuke iz dokumenta „Evropa bez barijera: Preporuke UNHCR-a Češkoj Republici povodom njenog predsjedavanja Evropskom unijom“;
2. Zajednička komisija za evropske integracije pozdravlja namjeru češkog predsjedništva EU da osigura još veći napredak ka uspostavljanju zajedničkog evropskog sistema azila, što podrazumijeva poboljšanje standarda u zaštiti izbjeglica širom Evrope;
3. Zadužuje se Sekretarijat PSBiH da navedene preporuke dostavi svim poslanicima i delegatima PSBiH jer mogu značajno pomoći u njihovom nastojanju da Bosna i Hercegovina ispuni svoje obaveze prema međunarodnom pravu i pravu EU u oblasti azila i slobode kretanja;
4. Zaključke dostaviti predstavništvu UNHCR-a u Bosni i Hercegovini.

Ad. 5. Tekuća pitanja

1. Predsjedavajući Komisije Halid Genjac podnio je Izvještaj sa 11. interparlamentarnog sastanka PSBiH i Evropskog parlamenta, održanog 20. i 21. januara 2009., u Briselu. Izvještaj je jednoglasno usvojen.

2. Raspravljalo se o odluci Zajedničkog kolegija oba doma Parlamentarne skupštine BiH prema kojoj na 11. interparlamentarnom sastanku mogu učestvovati samo tri člana Komisije. Naime, navedena odluka donesena je 15. 1. 2009., kada su svi detalji o održavanju sastanka već bili dogovoreni, i promjena sastava bh. delegacije naišla je na veliko nerazumijevanje i neprihvatanje Doris Pak, predsjedavajuće Delegacije EP za odnose sa zemljama Jugoistočne Evrope, koja nam je jasno stavila do znanja da se sastanak ne mora ni održati ako ga članovi Zajedničkog kolegija PSBiH ne smatraju dovoljno važnim. Članovi Komisije, u svakom slučaju, podržavaju politiku racionalizacije putovanja članova PSBiH, ali žele skrenuti pažnju na izuzetnu važnost interparlamentarnih sastanaka koji se održavaju svake godine i kojima uvijek prisustvuje šest članova Komisije, od kojih se očekuje veoma aktivno učešće.

Alma Čolo dala je primjedbu na izostanak reakcije Sektora za odnose s javnošću PSBiH povodom negativnog predstavljanja rada Parlamentarne skupštine BiH.

Hilmo Neimarlija ukazao je na nedosljednost Kolegija prilikom odlučivanja o putovanjima poslanika, navodeći primjer da je pet poslanika otputovalo na Molitveni doručak u Vašington, a da je broj članova delegacije Zajedničke komisije za EI koja je trebalo da učestvuje na 11. interparlamentarnom sastanku smanjen zbog troškova putovanja.

Zaključeno je da se ovim povodom kolegijima Doma naroda i Predstavničkog doma uputi protest.

3. Razmatran je problem imenovanja direktora Direkcije za evropske integracije BiH, koje je, prema mišljenju predsjedavajućeg Komisije, izvršeno u suprotnosti sa Zakonom o državnoj službi u institucijama BiH.

Nakon rasprave, Komisija je jednoglasno usvojila Zaključak da se pozove Vijeće ministara BiH da riješi problem vršioca dužnosti direktora Direkcije za evropske integracije BiH u skladu sa Zakonom o državnoj službi u institucijama Bosne i Hercegovine, i da se, što je prije moguće, završi procedura u vezi sa izborom novog direktora.

Sjednica je završena u 12,40 sati.

Predsjedavajući

Zajedničke komisije
Halid Genjac